



LOPEZ-MENDIZABAL'dar IXAKA'k

# XABIERTXO

Umiei euskeraz irakurten erakusteko idaztia

Bizkaieraz:

AITA ONAINDIA'k

## Xabierto

Emen agiri dan mutiltxo au Xabierto da.

—Egun on, amatxo! Egun on, aita!

—Egun on, Xabierto!

Ogetik jagikera egun onak  
emon bear dira.



Aita ta ama asko maite dauz  
Xabierto'k.

Xabierto oso ona da. Bere  
arrebak Izierto'k asko maite  
dau.

Seme ona, gurasoen poza iza-  
ten da.

Ume onak ez dira bein be al-  
karren artean asarratzen.

Jainkoak ez dau nai iñori kal-  
te egiterik.

Guztiok anaiak gara ta guztiok alkar maite izatea nai  
dau Jaungoikoak.

## Izierto

Emen aurrean daukazuen au Izierto da.

Bere neba Xabierto'k lez, jagi ta bereala Jaungoiko-  
ari eskerrak emoteko,  
Aita gurea eta Agur Mi-  
ren esango dauz.



Oeratzean be beti  
egiten dau otoi.

Lo dagoanean zaindu  
dagiala, eskatzen dau-  
tso Jainkoari.



Eta etxeke guztiai  
osasuna emon dagioela.

Izierto oso biotz onekoa da. Ixilla, zintzoa ta garbia.  
Bere gurasoak asko maite dabe. Bere amari etxea apain-  
tzen be laguntzen dautso.

Ez dau bein be guzurrik esaten.

Ez da bein be guzurrik esan bear.

## Garbitasuna

Xabierto'k ikastolara joan baiño lenago arpegia eta eskuak urez ondo garbitzen dauz; baita ulea orraztu ta jantziari autsa kendu be.

Bazkaldu baiño len eskuak, eta bazkal-ondoan aboa, urez garbitzen dauz. Ortz eta agiñak sendoak izan eta luzaroan irauteko, aboa garbitzea dala onena esaten dautso amak.

Garbitasuna osasuna da. Izan gaitezcan garbiak.

## Ikastolara

Xabierto'k, ikastolara joan baiño len, bere aita ta amari agur egiten dautse, eta bere arreba Iziarto'gaz etxetik urtetan da.

Bidean ez dira iñun gelditzen.

Ikastolara joan barik bidean lagun gaiztoakaz batuten danak, ez dau bein be gauza onik ikasiko.

Xabierto'k egun-onak emoten dautsoz Irakasleari ta onek esandako guztia ondo entzuten dau. Onela laster izango da Xabierto mutil guztietan geien dakiana.

## Ikastolako atean

Ikastolako atean bere lagun bat aurkitzen dau.

—Nora oa?

—Ikastolara.

—Gaiozak alkarregaz pelotan jolastera.

—Ez, ikastolara joan nai yoat. Joaten ez ba'gaituk ez yoagu ezer ikasiko.

Xabierto'k ikasteko gogoia dau.

Xabierto mutil on bat izango da.

## Irakurtea bearra da



Xabierto'k ikasi dau irakurten.

Martin'ek, alperra dalako, ez dau irakurten ikasi nai.

Beste lagun guztiak bereala ikasi eben, eta gauza po-

litak irakurten ebezan: Manu Sorgin ta Baso-Jaunaren edestiak. Eta pozez inarduen areik irakurten.

Martin, barriz, beti aspertua egoten zan.

—Ik be ikasi egik, eta gauza politak jakingo dituk —esan eutson Xabier'ek.

Eta Martin'ek irakurten ikasi eban. Ez yako, ez, damutu.

Ezjakifia errukarri da.

## Gizabidea

Gizabideak erakusten dausku zer eratan ibilli bear dogun gizartean.

Umeak, elizan dagoanean, ez dau ibilli bear batetik bestera, itz egiten eta atzera begira. Jainkoaren etxean dago ta ixil ta apal egon bear dau.

Etxean eta ikastolan be istillu barik egon ta ibilli bear leuke. Ume txarto eziak beti izketan (berbetan) eta beti deadarka ibiltan dira.

Maian ezagutzen da ondoen, umea ondo ezia ta azia dan ala ez. Agintzen dautsoen tokian jarriko da eta ez da jaten asiko besteak asi artean. Aboan jana daukanean ez dau urik artuko, eta edan-aurretik eta atzetik ezpanak ezpain-zapiz garbituko dauz.

Ume ondo ezia, nunai ondo ikusia izango da.

## Gizona

Gizona Jainkoak lur pizka batez egin eban.

Eta bere antzera egin ebalako gizonaren soiña arrigarria ba'da, bere adimena oraindik be arrigarriagoa da.

Onetsi dagigun Jaungoikoa, sortu gaitulako.

## Giza-soña

Gizonaren soiñak iru zati dauz: Burua, Soin-enborra eta Soin-adarrak.

Buruan doguz begiak, belarriak eta surra: begiak, gauzak ikusteko; belarriak, otsak entzuteko; eta surra, usaiña artzeko.

Aboan doguz ortzak eta agiñak eta miña: ortzak eta agiñak, janariak birrintzeko, eta miña berba egiteko.


Buruan doguz garunak be.

Burua da gure soiñaren zatirik nagusiena.

## Soin-enborra

Soin-enborrak zati bi ditu: bularra ta sabela.

Bularrean **aldebitara** birikiak **doguz**. Onein bidez arnasa artzen dogu.



Birikien artean **biotza** dago. Biotzak ibileraztan dau gure zantant odola, eta gelditu barik beti lanean diardu, gu bizi gaitazan.

Sabelean, urdaila, gibela, guntzurrunak eta esteak **doguz**.

**Soiña** zutik egon dedin, bizkar-azurra da atzean.

Urdaillean, batez be, janariak zetzen dira.

Azteko jan egin bear da.

Baiña geiegi jatea kaltegarri da.

## Soin-adarrak

Soiñeko goikaldean besoak **doguz**. Beso bakoitzak zati oneik ditu: sorbalda, besondoa, besogaiña, eskumuturra ta eskua.

Esku bakoitzean bost atz **doguz**.

Azpiko soin-adar bakoitzean, istarra, belauna, berna, orkatilla eta oiñak daukaguz.

Eskuak, gauzak artzeko dira, eta oiñak, zutunik egon eta ibilteko.

## Ikusmena

Begien bitartez ikusi egiten dogu.

Begiak doguzalako ikusten doguz gure aita, gure ama, gure anaiak, gure arrebak: ikusten doguz baita mendiak be eta zelaiak, itxasoa, eguzkia eta izarrak.



Begiak esaten dauskue gauzak zuriak, baltzak, urdiñak ala gorriak diran; baita gauza orreik urrun ala bertan dagozan be.

Betazalak begiak estaltzeko doguz, eta betazalen ertzetan betuleak dagoz.

Itxu gaixoak errukarri dira. Betiko gabean bizi dira. Euren erruki izan dagigun.

## Entzumena



Belarrien bidez entzuten doguz itzak, oiuk eta deadar  
ta karraxiak. Entzuten dogun guztiari otsa deritxogu.

Belarriak esaten daukue zeintzuk diran ots atsegiñak  
eta zeintzuk, ots atsekabeak.

Ondo entzuten ez ba'dogu, ezin geinke gauzen barri  
zuzen jakin. Ondo entzuteko buruak be ernai egon bear  
dau.

Umeak burua ernai eukiten ez ba'dabe, ez dabez ira-  
kaslearen erakuspenak entzungo, eta onela ez dabe ezer  
be ikasiko.

Entzun ondo, ume maiteok.

## Usainmena

Surraren bidez artzen doguz usaiñak.



Sagarraren eta lore askoen  
usain gozoak atseginu egiten  
gaitu.

Txakurrak urrunetik asme-  
tan dau bere nagusia.

Surrak bereala esaten dauku  
aize kaltegarria nun dagoan.

Usain txarreko aizea osasuna-  
rentzat kaltegarri da.

## Gozamena




Aboaz, eta batez be ao-sabaiaren bidez, artzen dogu gauzen gozoa.

Sagar bat ikusi geinke, ta bere usaiña artu be bai, baiña aren gozoa artzeko bere ataltxo bat beintzat aboan sartu bear dogu.

Eztia, gozoa da; itxasoko ura, gazia; ozpiña, garratza. Sagar batzuk, gaziak dira; besteak, gezak; eta beste batzuk, gazi-gezak.

## Ikumena



Eskuaren bidez ikutzen doguz gauzak. Berak esaten dausku ikutzen doguna biguna ala gogorra dan; leguna ala lakarra; otza ala beroa.

Oiñak be laguntzen dausie ontan eskuai. Bereala esaten dausku oiñak leku bigunean ala gogorrean gagozan; leku zakarrean ala labankorrean gabiltzan.

Askotan gure eskuak aldatu-azoten dauskue, begiz oker artu dogun eritxia. Begiz legun agertzen yakuna, eskuak, sarri, lakarra zala azaltzen dauskue.

Eskua izaten da itxu gaixoaren begia.



## Gogoa

Jainkoak gizonaren soiña, auts pixka batez egin eban eta arpegian aize emonaz gogo edo arima sortu eban bere barruan. Gogo edo arimak bizi gaitu.

Gogoaren bidez oldoztu edo pentsatzen dogu.

Gure maitetasunak, gure atsegiñak, gure atsekabeak, gauzen eta egipenen gogorapena, gure asmoak, ez dagoz soiñean, gogoan edo ariman baiño.

Ardura gitxi bear leuskigu soiña eder edo itsusi (motz) izateak.


Arima garbia, ona, maitatia: auxe da guztiok izaten alegindu bear geunkena.

Gure arima ez da ilgo soiñagaz batean. Soiña, barriro be, auts biurtuko da; baiña gogoak beti iraungo dau. Illezkorra da gure gogoa.

Izan gaitez an gorputzez garbiak; baiña arimaz, al bada, garbiagoak.

Arima on eta garbiai gure Jainkoak betiko zoriona emongo dautse.

## Jantzia



Neguan, jantzi lodiagoak erabilten ditugu. Jantzi beroenak, artilezkoak dira. Artilea ardiaren uleaz egina da.

Udan jantzi arinagoak erabilten dira. Eunaz eta oialaz egiten dira gure jantzi edo soiñekoak.

Abarkak dira aspalditik gure baserritarrak ibiltzen dabean oiñetakoak.


Jantziak austen diranean, jostorrazaz josten dira.

Ume txukunak soiñeko gitxi urratzen dau.

## Janariak

Gizonak ogia,  
barazkiak, igali-  
ak, aragia, arrai-  
ñak jaten dauz.

Goizetik artzen  
danari gosaria  
deitzen dautsogu,  
eguerdikoari bazkaria ta gabekoari aparria.



Zaldiak, beiak, astoak, ardiak bedarra jaten dabe.

Txakurrak, legoiak, katamotzak, aragizaleak dira.

Katuak, arraiña naiago dau.

Oilloak, garauak jaten dauz.

Txori geienak, garauak eta zomorroak jaten dabez.

Geiegi jatea kaltegarri da.

Ez da bein be geiegi jan bear.

## Ogia

Garia batu ondoren errota batera, bolu batera, eroa-  
ten da.

An errotariak, garaua eioaz, autsa egiten dau. Autsa  
oni uruna deritxo.

Okiñak, ur eta urunaz, oreaga egiten dau.

Gero orantza erantsita, legamia egiten da.

Ondoren laban erre ta ogia egiña gelditzen da.

## Ogirik ez da bein be bota bear

Martin'i bere amak ogi zati bat emon dautso gaiñean  
eztia dauala.

Martin'ek eztia miazkatzen dau.

Eta ogia bota egin dau.

Ori txarto egiña da.

Ez da ogirik bein be jaurti bear.

Beartsu askok pozik artuko eben ogi-apur ori.

## Edariak



**Edaririk onena ura da.**

**Ardoa matsaz egiña da, eta sagardoa sagarraz.**

**Beiak emoten dausku esnea.**

**Esnea umeentzat oso ona da.**

**Esneaz egiten da gaztaea.**

**Ardoak, geiegi edan ezkeru, kalte aundiak ekarten dauz.**

## Iziartxo'k biotz ona dau

**Iziartxo eskolatik dator.**

**Bidean, oiñutsik dabillen ume gaixo bat ikusten dau.**

**—Erdur neugaz etxera ta oiñetakoak emongo dautzudaz.**

**Amak umetxoari oiñetako batzuk emon dautsoz.**

**Al dan guztian, on egin bear da.**

## Esaera zarrak

**Gaur egin dagikezuna ez biarko itxi.**

**Zeuk egin dagikezuna besteri ez egin-azo.**

**Merkea dalako, bear ez dozun gauzarik ez bein be erosi.**

**Arrokeriak, diru asko eroaten dausku.**

**Gure burua goregi jaso naiak, askotan barregarri izten gaitu.**


**Gitxitan damutzen yaku gitxi jana; baiña geiegi jana, askotan.**

**Gogoko tokian, aldaparik ez.**

**Gauza guztiak bere alde onetik ar egizuz.**

**Ez geiegi itzegin, nai ez bada utsegin.**

## Erregea ta tximiñoak




Errege batek tximiño asko ei ebazan, eta dantzan egiten erakutsi-azo eutsoen. Bein soiñeko ederrez jantzi ebazan eta arein dantzak ikustera lagun batzuei ots egin eutsen.

Ba ebiltzan dantzan tximiñoak, baiña ikusle aetaiko bati gogoratu yakon intxaur batzuk dantzariai botatea.

Berealaxe euren dantzak itxita tximiño guztiak, intxaurrak arrapau bearrez, alkarren artean burrukan asi ta, alkarri atzamarka, soiñekoak ausi ebezan, len baizen tximiño geldituaz.

Onek erakusten dausku jantziak ez daula gizona egiten. Eta on itxuraz agertu nai ba'dau norbaitek, gaizto izanik, azkenean gaizto lez agertuko dala.

## Etxea



Ludi edo lur onetan izan ziran lenengo gizonak, lezaetan eta arkaizpetan bizi ziran.

Gero txabolak egiten asi ziran.

Abere gaiztoen erpetan ez jausteko, txabola orreik, askotan, uretan sartutako taket-gaiñean egiten ebezan.

Gaurko egunean, gizonak, etxeetan bizi izaten dira.

Etxe orreik batzuetan iru ta lau bizitza, eta baita geiago be izaten dabez.

## Kun-kun



Ez negar egin. Nik emongo, bai,  
sagar bat zimel-zimela:  
amama baizen zimurra eta  
gozoa bera bezela.  
Au janaz, ondo, magaletxoan  
atsegindurik aurrena,  
seaskan lo lo, ene potxolo,  
jarriko zaitut berela.

Ekatzu moxu,  
gero lo egin dagizun.  
Lo, lo, tira, maitea;  
lo, lo... kun-kun, kun-kun...

Aingeru maite zoragarria  
zorigaitz bat ez dozuna,  
kuman orrela mugira geldiz  
ames egiten dozuna;  
zeiñen goxoak diran zuretzat,  
nire maitetxo kutuna,  
amon zarraren kantua eta  
kumatxoaren kunkuna!...

E. Arrese'k



## Erria

Etxe asko alkarren bertan batzen diranean, erria egi-  
ten dabe.

Erri batean kaleak edo karririk, enparantzak, ibilto-  
kiak, lantegiak, ostatuak eta beste gauza asko ikusten di-  
tugu.

Erriko-etxean, erria zaindu ta zuzentzen dabenak ba-  
tuten dira.

Ibaiak alde batetik bestera igarotzeko izaten dira zu-  
biak.

Eliza Jainkoaren etxea da, eta Berari otoi egitera joa-  
ten gara elizara.

## Baserria

Baserrian, nekazaria bizi da.

Bere soloak bertan ditu ta bere basoak inguruan.  
Mendigaiñean, atsegintasunez beterik, zuri-zuri ikusten  
dogu baserria.

## Nere etxea

Ikusten dozu, goizean  
argia asten danean,  
menditxo baten gaiñean,  
etxe txikitxo aurre-zuri bat  
lau aitz andiren artean,  
iturritxo bat aldean,  
txakur zuri bat atean?  
An bizi naz ni bakean.

Naiz ez izan gaztelua,  
maite dot nik sor-lekua,  
aiten aitek autatua.  
Etxetik urrun yat iduritzen  
nunbait nazala galdua;  
antxe ni bainaz sortua,  
an itxiko dot mundua,  
galtzen ez ba'dot zentzua.

Ez da lurrean gizonik,  
ezta bere jaun aundirik,  
ni baiño obeto danik:  
ba-dot andrea, ba-dot semea,  
ba-dot alabea be nik;  
osasun ona batetik,  
ontasun naiko bestetik...  
zer nai dagiket besterik?

(Elizanburu'k)

## Argia



Egunez argi  
dago.

Eguzkiak bere  
argia nunai zabal-  
tzen dau.

Gabaz, illargi-  
rik ez danean,  
illun dago.

Eta etxe ba-  
rruan be ez da  
ezer ikusten.

Ortarako argia  
biztu bear da.

Aspaldian orioaz, argizaiaz, lerrargi eta arrorioaz egiten eben argia.

Orain tximistargi ederra, erri txikienetan eta base-rietan be ikusten dogu.

Gure aurrekoak, orrelako argi ederra ikusi izan ba'leben, berari begira zoraturik egongo ziran.

## Argiña ta zurgiña

Orreik izan dira gizonaren lenengoetatiko langintzak. Bion artean egiten dabez etxeak.

Argiñak, ormak egiten ditu. Lenengo, lurpean ormarren oiña artzen dau. Gero, arria arriaren gaiñean ipiñiaz, ormak jaso.

Zurgiñak edo arotzak, zura landuaz, ateak eta leioak egiten ditu.

Berak egingo dauskuz baita aulki, mai, mailladi edo zurubi ta beste gauza asko be.

Etxegaiña be berak egiten dau. Etxegaiña teillaz estaltzen da, euria barrura sartu ez dedin.

## Alaitasuna



Xabierto beti pozik dago.

Bere lagunakaz beti jolasten da.

Martin, barriz, beti bekoki-illun dago. Bere lagunak, bakarrik izten dabe.

Xabierto alai da.

Ume alaiak oso maiteak izaten dira.

## Langintzak

Ogia, okiñaren etxean egiten da.

Aragia, arategian saltzen da.

Gatza, ozpiña, lukainkak, indiarak, idarrak, jangai-saltokian.

Gozokiak, gozotegian.

Ardaua, ardantegian; sagardoa, sagardotegian.

Eunak eta oialak, oialdegian.

Oiñetakoak, oiñetakotegian.

## Beste langintzak

Beste lagintza asko be ba-dira.

Jostunak egiten dauskuez gure jantziak.

Idaztigilleak, irakurten doguzan idaztiak.

Arrantzaleak arrapatzen dauz arraiñak.

Ikazkiñak egiten dau ikatza.

Osagilleak osatzen gaitu gaixotzen gareanean.

Bizargiñak bizarra kendu ta ulea moztuten dau.

Nekazariak, lugiñak lantzen ditu lurrak.

Errementari edo burdin-arotzak, burdiñeaz gauza asko egiten dauz.

Baratze-zaiñak zaintzen dauskuz gure baratzak.

## Menastak

Burdiñea menasta da.

Beruna, urrea, ta zidarra be menasta edo meatzak dira.

Gauza asko, menastaz egiñak dira.

Urre, zidar ta burdingorritz egiña da dirua.

Urre ta zidarretik gitxi da, ta garestiak dira.

Geien erabilten dana, burdiñea da.

## Mendiak

Ludiaren tximurrai mendiak deitzen dautsegu.

Mendiak dira, gu bizi garean tokiaren apaingarri.

Mendi orreitako batzuk oso goituak dira, eta tontorra beti edurretan dabe.

Ernio-menditik erri asko ikusi daitekez. Eta eguraldi garbia danean, urriñera, urdin-urdin ikusten da itxasoa.





**MENDIAK**

## Abendak



Gizon guztiak soña bardiña dabe.

Baiña narruaren mar-  
goa ez dabe bardiña.

Batzuk narrua zuria  
dabe.

Besteak, oria.

Besteak, gorria.


Besteak, baltza.

Baiña guztiok

Jainkoaren semeak ga-

ra, eta geure

artean, anaiak.



## Azia

Landara guztiak, euren azia emoten dabe. Azi bat, lurpean sartzen ba'da, erne egiten da. Baiña orretarako urez busti bear da. Eta bero egin bear dau.

Udabarrian, batez be, erneten dira landarak. Azia erne danean, jaio ta landara egiten da.

Azi txiki-txiki batetik, askotan, zugatz aundi bat sor-  
tzen da.

## Zugatza



Zugatza da lurraren jantzirik ederrena.

Begira egiozue zugatz oni.

Bere zanak lurrera josia daukie.

Bere gerria goruntz jasoten da.

Goratxoago adarrak zabaltzen ditu.

Adarrak ostoz eta lorez beteak dagoz.

Lora orreik, gero, igali ederrak emongo dabez.

Zugatzak bere zanetatik artzen dau janaria.

Zanak lurpean artzen dabe janaria.

## Abiak



Arbazta txikiak bat-banaka batuaz Udabarrarian egiten ditue txoriak abiak. Arbazta txiki ta bedar-izpiz egiñak izaten dira txori-abiak. Arrautzatxoak egiten ditu txoriak abian eta arrautzatxoak bero-beroa euki ondoren txori txikiak jaioten dira.

Txoriak laguntza aundiak egiten dauskuez. Zomorro gaizto asko ilten dabez.

Abesti gozo ta politak abestuaz, gure biotza atsegiñez beteten dauskue.

Ez egin txori gaxoai kalterik. Ez arririk bota txoriai.

Ez egizue txori-abirik apurtu.

## Elaia

Elaiak gure leio-ertz ta teilla-egal azpian ipinten dabez euren abiak.

Egan dabilzala, zomorro txar asko il eta aizea garbitzen dabe.

Udazkenean elaiak emendik alde egiten dabe. Toki epelagoetara joaten dira.

Baiña urrengo Udabarrian, len egin eben abira etorriko dira barrero be.

## Ume errukitsua

Iziartxo'k etxeko atadian, txarto jantzitako ume bat ikusi dau.

—Nun bizi zara?

—Etxerik ez dot.

—Ogi-apur bat jango al dozu?

—Bai eta pozik, oindiño ezer jan barik nago-ta.

—Eutsi, ba, ogi-zati au.

—Eskerrik asko.

Iziartxo biotz-errukitsua da.

Gose danari jaten emioizue.

## Artzaiña eta ardiak



—Zatoze onuntz arin,  
zatoze, anaiak—  
deadar egiten dau  
Perutxo artzaiñak;  
—otso aundi bat dator  
mendi otan bera,  
zuzen-zuzenik ona,  
ardiak jatera—.

Ta badoaz anaiak  
makillak arturik,  
bildurrez geldi dadin  
ardi gabetanik.  
Beingoan eldu dira  
lertzeko zorian,  
baiña ez da agiri  
otsorik mendian.

Biurturik ba-dagoz  
geldiro etxean.

Orobat gertatzen da  
biamonean.  
Bigarren txalmak daukaz  
txit ereztaturik;  
urangoan ez dabe  
egin jaramonik.

Orduan egi-egiz  
otsoa jatxiaz  
menditik artaldera,  
laster an asi zan  
ardirik ederrenak  
ilten eta jaten,  
eta, erruki zana,  
artaldea galtzen.

Guzurra esan eban  
bi bider artzaiñak  
eta ez eutsoen nai  
siñistu anaiak.

Guzurtiak egia  
baldin ba'dau esaten,  
guzurtia dalako  
ez yako siñisten.  
Onela egiten dau  
beretzat kaltea.  
On da beti egia  
nonai esatea.

(Iturriaga)

## Ura

Iturrietako ura, edateko ona da.  
Iturrietako urak, ibaietara jasten dira; eta ibaietako  
urak, itxasora.

Itxasoko ura, gazia da.

Iturrietakoa, geza.

Uraren lurrinak, odeiak eta laiñoak egiten dauz; eta  
orreitatik euria jausten da.

Ur barik ez gu, ez abere, ez bedar, ez zugatzik ezin  
bizi geintekoz.

Beraz, ura bear-bearra da.

## Uraren bearra

Ezek ez dausku urak baiño obeto egarria kentzen.  
Uraz garbitzen ditugu gure soiña, mosua ta eskuak.  
Uraz garbitzen dira gure jantziak, ontziak eta beste  
gauza asko.

Bedarrak, landarak, zugatzak, ura bear dabe erneteko  
ta azi ta euren igaliak emoteko.

Iñor ezin bizi daiteke urik bage.

Origaitik zabaldu dau Jainkoak ain ugari.

Urik ez daben tokiak, illak lez agertzen yakuz.

## Txakurra eta aragi-puska



Txakur bat joian bein ibai-ondo batetik aragizati bat aboan eroala; eta joiala-joiala, uretan bere aragi zatiaren erraiñua ikusi eban.

Iruditu yakon beste au, berak eroana baiño aundia-goia zala, eta agiñetan eroana itxita urari osk egin eutson, eta onela gelditu zan ez egiazko zatirik ez guzurrezkorik, ezer bage.

Ori jazoten yake askotan, eurena gitxi dalako, besteena arrapatu nai dabenai.

## Ura zelako eratan agertzen yakun



Iturburuetan sortzen dan ura, iturriak egin eta gero mendietatik b e r a jatsiaz - jatsiaz, lats edo erreketan batzen da.



Urak batuta geratzen diran tokiai aintzirak edo zingirak deitzen yake.

Ibaitako urak itxasora joaten dira; eta alan be ez dau onek bein be gaiñez egiten.


Gero itxasotik aterako dan lurrenak odeiak sortuko



ditu: odeiak euria egingo dabe; eurtik iturriak sortuko dira; iturrietatik i b a i k, eta ibaiak barriz itxasora b i u r t u k o dira, beti Jainkoak emondako bi-detik.



## Egaztiak



Jainkoak, egan ibilli eitezen, egin ebazan egaztiak.

Aidean dabe euren bizitokia eta an ibiltzen dira, gora ta bera, arin ta bizkor.

Euren abietan arrautzak egin eta arrutzetatik txitoak ateraten dabez.

Egaztiak, era askotakoak dira. Txepetxa oso txikia da, eta arranoa aundi ta indartsua.

Goizaldean, eguna asten danean, txoritxoak abestu ta abestu diardue, Jainkoari eskerrak emonaz lez. Euren txorrotxio ta txiruliruak atsegiñez beteten gaituez.

## Esaera zarrak

Urak dakarrena, urak daroa.

Ur aundietan, arrain aundiak.

Urte euritsu, urte ogitsu.

Urte edurtsu, urte garitsu.

Txori bakoitzari, eder bere abia.

Oillo ibilkari, azerien janari.

## Urrezko arrautzak egiten zitian oilloa


Nekazari batek, urte guztian urrezko arrautzak egiten zitian oillo bat ei eukan.

Baiña gizon a oso diruzalea zan, ta ezin itxoegin nunitik oilloak bat-banaka egiten ebazan arrautzai, ta iltea bururatu yakon, urre guztia batean arrapatzeko asmoz.

Il eban bada oilloa, baiña alper-alperrik: oilloa barrutik beste oillo guztiak langoxea zan, eta ez eutson barruan urrerik bat be aurkitu.

Eta an geratu zan gizon diruzalea, ez oillo, ez urre.

## Arraiñak



Arraiñak urpean bizi dira, eta urpean arnas artzen dabe.


Uretatik ateraten ba'ditugu, bereala ilten dira.

Itxasoan sortzen diran arraiñai, ur gaziko arraiñak deitzen yake, eta orrein artean dagoz sardiña, lebatza, makailloa eta beste asko.

Besteak, ur gozokoak dira, eta orreitan amorraiña oso ezaguna da.

Beste batzuk, barriz, ur gazia ta ur gozoa batuten dan tokian bizi izaten dira, izokia esaterako.

## Etxeko abere ta piztiak



Gure etxeetan izaten doguzan abereak, laguntza aundiak egiten dauskuez.

Beiak esnea emoten dausku.

Zaldi, asto ta idien indarra, gauzak eta burdiak erroteko ta lurak lantzeko izaten dogu.

Ardiak artulea emoten dauskue. Oloak arrautzak. Katuak barriz, saguak arrapatzen ditu.

Eta txakurrak, etxea zaintzen-eta, laguntza aundiak egiten dautsoz gizonari.

Katua oso etxezalea izaten da, eta sukaldeko beroan  
luzaro ikusiko dozue arrain edo aragi zatiren bat noiz  
arrapatuko daben zain.

Txakurra ta katua geienetan asarre izaten dira. Baiña  
zitalak ez diranean, alkarren lagun lez agertzen yakuz.

Adizkide izateko, gogo ona izatea naikoa da.

## Lagunak

Aitona zarrak Xabierto'ri  
bere jaiotegunean  
pelotaxo bat erosi eutson  
jolastu zedin kalean.  
Bere pelota eskuan zula  
ikustatu ebenean,  
auzoko mutil koxkor guztiak  
an ziran danak batean  
Xabierto'gaz goiz-arratsalde  
pelotan egin naiean.  
Lagunik asko izan eban bai  
pelota eban artean...  
bakar-bakarririk zapuztu eben  
ura desegin zanean.  
Aitonatxoak ikusirikan  
tristerik eleiz-aurrean,  
ara zer esan eutson polito  
etxera eroanean:

«Orrelakoak askotxo dira  
gaurko mundu okerrean;  
kontuz ibilli, ene kutuna,  
lagunak aukeratzean:  
lagun zintzoak lagun bear dau  
onean legez txarrean».

(Sarriegi'k)

## Aita nolako, seme alako

Agintari zital bat  
ezkontzerakuan,  
bertsolaria egoan  
polito kantuan:  
—Eguzkiak bere bein  
ezkondu nai eban;  
orruaz asi ziran  
igelak orduan:

—Eguzki bakarrakin  
naiko lan daukagu;  
nai ta nai ez mutil zar  
izan bear du.  
Bada, ezkondu eta  
umerikan ba'lu,  
errukarri benetan  
bai giñakela gu:  
Ur dana ondatu,



bazterrak kixkaldu,  
gu guztiok galdu.  
Gutzaz urrikaldu!  
ta orrelakorik ez  
guri bialdu!

(Sarriegi'k)

## Zelako aldea

—«Aize-bolarak esku artean  
jarri zazkitan ostroa,  
esan eidazu nundikan dozun  
ain usain eder-gozoa».

—«Orbela nozu, larros-artean  
luzarotxoan egona;  
ortik datorkit artzen daustazun  
lurrun gozozko usain ona».

Lagunetatik lagunetara,  
ai!, zer zelako aldea:  
Onekin ona, txarrekin txarra  
izango zara, maitea.

(Sarriegi'k)

## Erleak

Batetik bestera, lorerik-lore doian euli antzeko ori,  
erlea da.


Lan eta lan diardu egun guztian loretatik guna gozoa  
artu ta bere abaraskara eroaten.

Abaraska orreik, argizaizkoak dira eta erleak berak  
egiten dauz.

Abaraska-zulo txikietan gordeten dau erleak lorien  
gunaz egindako eztia, beretzat janari izan dagian.

Erleak oso langilleak dira, eta euren bizitzak gauza  
arrigarri asko erakusten daukuz.

## Golde biak



Golde bi salgai egozan. Bata saldu zan. Bestea, ostera,  
saldu barik zoko batean gelditu zan.

Etxera eroan baizen laster, idiak buztartu ta bereala lurrak goldetzen asi zan.

Eta, orrelaxe, egunero lan egiñaz, beti garbi ta barria lez aurkitzen zan gure goldea.

Bestea, barriz, saldutokian geldi egonaz, erdoiez dana bete ta alperrik ondatu zan.

Geldi egoteak eta alperkeriak, lan egiteak baiño kalte geiago egiten dauala erakusten dauku ipuin onek.

## Mutil zintzoa

Xabiertxo'k ziba bat aurkitu dau kalean.

Bere Irakasleari emon dautso.

—Ziba au Andoni'rena da, antza.

—Itaun egiozu berari.

Xabiertxo'k antxe emoten dautso bere ziba Andoni'ri.

Andoni oso pozik geratzen da.

Xabiertxo be bai; gauza on bat egin bai-dau.

Ez dogu bestien gauzarik bein be geuretu bear.

## Ez da asarratu bear

—Ama: gaur goizean mutil bi asarratu dira kalean.

—Txarto egiña.

—Eta ni joan naz eurekana ta ez dala asarratu bear esan dautsiet.

—Ederto esana.

—Eta orduan adizkidetu egin dira.

—Xabiertxo: eutsi sagar au; gauza eder bat egin dozu.

—Ama: beste bat emoten ba'daustazu, mutil bi arei bana emongo dautsiet, lengo asarrea aztu dagien.

## Abereen garrasi ta otsak

Txakurrak zaunkaz jarduten dabe.

Katuak miauka.

Zaldiak irrintzika.

Astoak arrantzaka.

Oilloak karranka.


Txoriak txioka.

Oillarrak kukurrukuka.

Ardiak beeka.

Beiak muuka.

## Adizkide bi eta artza



Adizkide aundi bi  
ba-doaz bidean  
alkarrekin izketan  
alaitasunean.

Artz aundi bat yakie  
basotik urteten...


Ikaraz arbolara  
bata da igoten;  
bestea gelditzen da  
gaxoa bakarrik,  
artz aundiari ezin  
arpegi emonik.  
Zer egin onelako  
estutasunean?  
Illa ba'litz bezela  
jarten da lurrean.  
Artzak ez dabelako  
gorputz illik jaten,

usain egin ondoren  
da aurrera joaten.  
Bereala jatsiten  
da arbolakoa,  
eta lagunagana  
lasterka dijoa:  
—Adizkidea, diño,  
txit dot nik atsegin  
zu emen aurkitzea  
osasunarekin;  
zer ikarak ditudan  
zugatik eroan,  
bildurrez zu noiz artzak  
bear zinduen jan!  
Ixilik belarrira  
dautzu ak itz egin;  
zer esan ete dautzun  
nai neuke nik jakin.

—Ara zer esan daustan  
artzak belarrira:  
Munduan adizkide  
—era asko dira.  
Ez dozu artu bear,  
jakizu gaurdandik  
zure adizkidetzat  
gizon bildurtirik.

(Iturriaga'k)

## Lorea



Landarak lorán dagoz. Euren usain gozoa atsegin izaten dogu.

Zugatzak be loratu dira. Laster, lora ori zimelduta, igali ederra sortuko da, ordez.

Euri ta Eguzkiaren indarraz igalia azi egingo da.

Eta gero, igali orreik gure janari izango dira.

## Txori gaixoa

—Ama, txori bat arrapau dot.

—Polita izango da, e?

—Bai, oso polita.

—Zer egin bear dautsozu?

—Ankatik ari bat lotu ta jolasean ibilli.

—Ez, ene maite. Ori txarto egiña da. Txori gaixo orrek ez dautzu zuri bat bere kalterik egin. Itxi egiozu egan joaten, eta orrela poza ta bizia emongo dautsozu. Gaiñera, umetxoak be izango ditu eta bera barik il egingo litzakez.

Ez da bein be gaitzik egin bear.

## Mutil ona eta mutil gaiztoa

Xabierto'k maite ditu bere aita, ama, anai-arrebak eta lagun guztiak.

Xabierto zintzoa da.

Xabierto'k itxuen bat ikusten dauanean lagundu egiten dautso.

Xabierto'k asko maite dauz lagunak.

Martin, barriz, alperra da.

Martin guzurtia da.

Martin'i iñorgaitik ardurarik ez dautso.

Izan zaiteze Xabierto langoak, eta ez Martin'en antzekoak.

## Sugea eta nekazaria



Gizon bat ba-joian bein  
zelaitik etxera  
goiz guztian lan egin  
eta bazkaltzera.  
Ikusten dau bidean  
etzunik sugea,  
otzak erdi illikan  
korderik gabea.  
Errukituz sartzen dau  
gaixoa kolkoan,  
ango beroarekin  
bizteko asmoan.  
Etxera joan zaneko  
sugea asi zan  
kolkotikan kanpora  
atera nairikan.  
Gaiñetik botateko  
gizonak artzen dau,

eta suge gaiztoak  
orzka pozoitzen dau.  
Orra esker ederrak!  
Zitalen eskutik  
ez dau izango iñok  
bein be gauza onik.

Illabete baiño len  
suge axe bera  
otzak ikaraturik  
dator sukaldera.  
Oiuka asten dira  
etxeko guztiak;  
jarraituten dautsoe  
morroi-nagusiak.  
Sartzen da ukulluan...  
ba-dabiltza billa;  
aurkitzen dabe eta  
izten dabe illa.

Zitalkeriak ez dau  
bein be gauza onik,  
eta iñok ez dau nai  
ikusi zitalik.

(Iturriaga'k)

## Batuketa



Xabierto'k batuten ikasi  
nai dau.

—Zenbat dira bat eta bat?

—itauntzen dautso aitak.

—Bi, jauna.

—Eta bi eta bi?

—Lau, jauna.

—Zenbat sagar dagoz otzara  
orretan?

—Iru, aita.

—Eta mai gaiñean?


—Lau, jauna.

—Guztiak batu ezkeru, guztiak bat jota, zenbat izango  
dira?

—Zazpi.

—Orduan —diño aitak— iru ta lau zazpi dira.

## Kenduketa



Xabierto'k kenduketa egi-  
ten ikasi nai dau.

—Biri bat kendu ezkeru,  
zenbat gelditzen dira?

—Beste, bat jauna.

—Ik lau sagar ba'dauka-  
zak eta ire lagun bati bi emo-  
ten ba'dautsozak, zenbat gel-  
ditzen yatazak?

—Beste bi.

—Eta zazpi sagar otzara  
onetan ba'yagozak eta lau

kendu, zenbat geratuko dozak barruan?

—Iru, jauna.

—Ederto, oso ederto.

## Ludia

Gu bizi garean lekuari, Ludia edo Lurra deritxo.

Ludia be, Eguzkia, Illargi eta beste izarren antzera,  
borobilla da.

Lur gaiñean ikusten doguz zelai, mendi, ibai ta itxasoak.

Itxasoak estaltzen dabe lurraren gain geiena.

Mendi-tarte bati arana deitzen dautsogu; ta ibaiondoari, ibarra.

Lurra aizez inguratua dago, eta aize ortan arnasa artzen dogu.


## Udabarria

Lenengo elaiak datozanean, udabarria da. Eguzkiaren argiak, bedarraren margo orlegiak, loreen edegitzeak, zugatzen ostozabaltzeak, txorien abesti samurrak eta umeen jolasketak, gure biotza pozez beteten dabe udabarrarian.

Negu baltz ta atsekabea joan da. Ortze urdin ta garbiak gure biotza alaitzen dau. Loreak nunai sortzen dira.

Txoriak emen eta an euren abiak egiteko gaibilla dabil. Beste batzuk abietan umeakin dagoz; eta umetxoak, noizean bein, euren aotxoak edegita dagoz amak ekarten dautsen janariaren zain.

Zoaze udabarriko goiz eder batean baso edo mendi batera. An ezagutuko dozue ondoen, neguaren ondorengo udabarriaren atsegintasuna.



UDABARRIA

## Basoa

Gure mendiko basoetan era askotako zugatzak ikusten doguz.

Ezagunenak oneik dira: aritza, artea, gaztaiña, lizarra, zumarra, urkia, pagoa, izaia eta beste asko. Etxeak eta beste gauza asko egiteko zura ederrak emoten dauskuez guztiak.

Gernika'ko Aritzaren azpian egiten ebezan antxiña euskaldunak euren lege zarrak.

Gure mendi guztiak, basoz ondo orniduak izan bear leukie.

## Uda

Udea da urtearen aldirik beroena.

Egunak oso luzeak dira udan, eta gabak laburrak. Goizean lauretako argi da, eta argitasun orrek berak jagierazten gaitu.

Eta goiz jagiten dana, ez da bein be damutzen.

Zugatzak ostoz oso ornidu oi dira.

Lorak be, euren margo eder ta usain gozoak, orduantxe zabaltzen dabez.





Galburuak be udan ederto eldu oi dauz eguzkiak, eta orduan asten da nekazaria itaiaz lasto luzeak ebagiten.

Itxasertzetan bizi diranak be itxaso barearen gelditasunaz eta itxas-aizearen gozotasunaz, atsegiñez beteak aurkitzen dira udan.

Umientzat batez be, au da urtearen aldirik ederrena.

## Egun-Sentiko pozak

Bai gauz ederra dala  
goizean goizetik  
udaran jagi eta  
makil bat arturik  
mendian egitea  
ibiltxo bat beñik!

Ez da munduan izan,  
ez orain t'ez lendik,  
orrek damoskun baiño  
poz aundiagorik!

Ipar-aize leguna,  
likurtaz beterik,  
gure kolkora dator  
lorien tartetik;  
baztar guztiak dagoz  
intzez apaindurik,  
urdin-urdin zerua,  
pipirrika txorik,

eguzkia be barrez  
mendien gaiñetik;  
maindire bat bezela  
goruntz arroturik,  
laiño zuri goiztarra  
erreka-zulotik;  
jolasean amilka  
iturritxo garbik;  
emen larros politak,  
an krabelin gorrik.

(E. Arrese'k)

## Igeri egite

Zer gauza ederragorik, bero dagoanean uretan sartu eta bustialdi gozo bat artzea baiño?


Alantxe da, baiña, ene umetxoak, ez sartu bein be uretan, ibai edo itxasoan, igeri ondo dakien norbait laguntzeko aldamenean ez ba'dozue. Bestela, errez ito zindekez.

Igeri egitea gauza atsegiña ta bear-bearrekoa da. Igeriketa, gaiñera, osasungarri da.

## Udazkena

Udazkenean igali edo frutak batzen dira.

Egunak laburtu eta gabak luzatzen doaz.



UDAZKENA

Udea joan dala bereala ezagutzen dogu.  
Bero aundirik ez dau egiten eta giro atsegiña izaten  
da egun geienetan.

Gaiñera, uda zalako, ikaskizunak be alde batera itxiak  
egozan, eta orain barriz lanean asi bear da.

Beti jai ta beti jolasean ezin bizi geintekozala erakus-  
ten dauku udazkenak.

Bizi nai ba'dogu, lan egin bearrean gara.

## Labore-batzea

Au izaten da nekazarietzat urtearen aldirik onena.  
Ainbeste neke artu bai-eban udabarria lurrak lantzen,  
ongarritzen eta garbitzen.

Eta berak izan zituen bildurrak, udako ekaitz eta kas-  
kabarrak guztia galduko ete eutsoen?

Baiña orain nekazaria pozik da: madari ederrak, sa-  
gar usaindunak ta mats-mordo gozoak batu ditu.

Lan egin bear da beti, zerbait batu nai ba'da.

Ereiten ez dauanak, ez dau batzen.

## Negua

**Negua da urtearen aldirik otzena eta atsekabeena.**

**Laiño baltzetatik euria dario neguan, eta askotan, otz baldin ba'da, ixil-ixillik, baita edurra be.**

**Baiña neguak bere atsegiñak be ba-ditu. Etxebarre-  
nean batu ta, orduan be lan egiten da; ta arrats luzeetan  
sutondoan aldi ederrak igaroten dabez senideak alkarren  
artean jolasean edo aita ta amaren irakaskizunak ikasten.**

**Lan egin dagigun gogoz neguan, gero eguraldi onak  
etortean, egurastera poz geiagoz urten gaitезan.**



## Eguzkia

Eguzkia da Ludiari eta guri argia ta beroa emoten dauskuna.

Berari eskerrak, bizi gara. Eguzkia oztuko ba'litzake, bereala ilgo giñake.

Eguzkia gure Ludia baiño askoz aundiagoa izanarren, txikia ba'litz agertzen yaku, oso urrin bait-dago.


Ba-dirudi, Eguzkia Lurraren inguruan dabillega. Eta ez da orrela. Lurra da Eguzkiaren inguruan dabilgena.

Gaiñera Lurrak, edo Ludiak, egun bakoitzean bira bat emoten dau bere ardatzean.

Eguzkia urteten dan tokiari Eguzki-aldea edo Sortaldea deitzen yako. Eta sartzen dan tokiari Sartaldea.

Beso-zabalik ipinten ba'gara, eskubikoa Sortaldera eta ezkerrekoa Sartaldera dogula, aurrean daukaguna Iparraldea da, eta atzean Egoaldea.

Eguerdian Eguzkia Egoaldean dago.



## Egunsentia

Egunsentia dator goizero bezela argi-txintaz banatzen milla sentiera; gero txokon batetik mendien gaiñera urtengo da bar-irriz eguzki epela, nagitasun guztiak lurrari kentzera.

Goi-argitzen danean zerbait urrutia ezkututzen dijoa izarren argia;

urdin-urdin jantzirik  
zerupe garbia,  
laster osatutzen da  
ud'egun barria,  
ainbeste poz ta atsegin  
dakarren aldia.

(E. Arrese'k)

## Gizonaren bizia

Gure bizia, oso laburra da.


Jaioten da gizona, eta gero ainbeste lanetan azi ta  
bizi ondoren, azkenik, zartutakoan, il egiten da.

Baiña askotan ez da zartuta ilten. Askok, gaitzen bat  
arrapauta, gazterik aurkitzen dabe eriotza.

Ez uste izan, ba, ene umetxoak, betiko zariela.

Ikusten dogun guztiak, bere azkena izango dau.

Jainkoak bakarrik iraungo dau beti: Bera bakarrik  
da betiko.



## Illunabarra

Ixil-ixillik aurkituten da,  
ixil-ixillik mundua;  
ez da mendian ezer entzuten,  
ez bada ontzen oia;  
ixillik dago tantai-gaiñean  
lengo txori barritsua,  
lumatxo bigun arro artean  
gorderik bere burua.

Gero goi zabal miragarria  
urrez apaintzen danean,  
otoitz egiñik beti bezela  
oerutzen garenean...  
gau izartsuak estaltzen gaitu  
laiñuzko maindirepean  
errugabeko lo lo goxoa,  
egin dagigun bakean.

(E. Arrese'k)

## Ortzea edo zerua

Jaso egizuez zeuen begiak zerurantz. Eguna baldin ba'da ta garbi ba'dago, antxe ikusiko dozue zuen gaiñean Eguzki ederra, argia ta berotasuna ugari dariola.

Gaba baldin ba'da ta ozkarbi ba'dago, barriz, antxe ikusiko dozue gauzarik arrigarriena: aneika ta aneika, millaka ta millaka argi txiki bizi. Argi orreik izarrak dira. Eta izar orreik gure Eguzkiaren antzekoak dira. Oso urrin dagozalako agertzen yakuz txiki.

Zenbat izar dira? Iñok be ez daki: ezin zenbatu dai-tekez.

Gure Eguzkia be izar bat da, eta ez audienetaikoa; beste asko ba-dira aundiagoak.


Eguzkiak zortzi Inguruko nagusi ditu bere inguruan: Merkuri, Artizarra, Ludia, Marte, Jupiter, Saturno, Urano a Neptun. Gaiñera beste Inguruko txiki asko ditu.

Inguruko guzti orreik berez argirik ez dabe; izarbelak dira, eta guri egiten daukuen argia, Eguzkiak emona dabe.

Argiak iroiren edo segundo bakoitzeko 300.000 (iru-reun milla) kilometro ibiltzen ditu.

Eguzkiaren argiak gugana eltzeko zortzi minutu bear ditu.

Baiña izarrak askoz urrunago dagoz. Bertena dagoa-naren argiak bost urte bear ditu gugana eltzeko.



EGUZKIA TA IZARBELAK

Beste asko oraindik be urrutiago dagoz eta euren argiak baita millaka urte be bear ditue ona eltzeko.

Izarrik ederrenetaiko batzuek Antare, Siri, Aldebaran eta Arktur dira.

Izar aundi orrei, irudi bat lez agertzen yakuzanean, izartiak deitzen yake.

Izarti ederrenetaiko bat Orion (euskeraz «Iru Errege-ena») deritxona da.

Ezin gengike neurtu izartegiaren aunditasuna. Berak azaltzen dauku garbi, bere Egille, gure Jaungoikoaren aunditasun neurribakoa.

## Illargia

Izarrak argi egiten dabe, baiña izar-illak edo izarbelak berez argirik ez dabe.

Illargia izarbel bat da, eta Lurraren inguruan dabil.

Lurra edo Ludia baiño askoz txikiagoa da. Bertan agertzen diran itzalak, ango mendiak dira.

Mendi asko ta aundiak dira illargian.

Baiña dirudienez, an ez da iñor bizi.

Guri lez, Illargiari be Eguzkiak emoten dautso argia.

## Zugatzai ez kalterik egin

Zugatzak dira gure mendien jantzirik ederrena. Zugatzik bage gure mendiak soil eta bizirik bage lez egongo litzakez.

Eurak emoten daukue itzal gozoa, kerizpe atsegin-garria, udako egun beroetan.


Eurak emoten daukue, gure etxeak, gure maiak, jarlekuak eta beste gure tresna asko egiteko gaia.

Eurak emoten daukue gure janariak egosi ta erreteko errekaia.

Eurak laguntzen daukue neguko otzetan gure etxeak epeltzen.

Zugatzik bage gure ibaiak agortuko litzakez; gure olak geratu egin bearko leukie.

Kentzen dan zugatz baten ordeaz barri bi ipiñi bear litzakez.



## Eguraldi ona

Gaur eguraldi ederra dogu.

Goizetik nastuko zala zirudien, baiña odeitartetik eguzkia agertu da ta guztia argitasunez bete dau.

Mendi goituak oraindik be lausotan bilduak dagoz.


Toki eguteretan, ospeletan baiño giroago dago.

Itzala udan atsegiña izan arren, neguan atsekabea da.

Jaiegunetarako eguraldi ederra lakorik ez da, mendi batera igon ta ederto egurasteko.

Eguraldi ona, guztiontzat atsegiña izaten da.

Txoriak, batez be, ba-dirudi eguraldi ona danean egiten dabezala euren txorrotxiorik ederrenak.



## Eguraldi txarra

Aize indartsu onek, azkenik, ekaitza ekarri dausku.

Euri-jasa aundia da. Kaskabarra be nunbait izan bear dau. Kaskabarrak, eta batez be arriak, kalte aundiak egiten ditu.

Tximist aundia zan ori!... Bai trumoia be, ikaragarria izan da!

Etxe-gaiñean tximistorratza ba-dogu, ta ba-leiteke an jausi izana.

Ara! Eguzkia odei artetik urtetan asi da... Auxe da ostargi ederra!... Bai margo garbiak dituala! Gorria, urdiña, oria, orlegia...

Ez bada bildur izan, eguraldi txarraren ondoren eguraldi ona etorriko da-ta.



## Ekaitza

Estaltzen dabe zerua odei  
izugarriak  
guztia dar-dar ipinten trumoi  
dunboslariak;  
bildurtzen gaitu gau illunean  
tximistargiak,  
t'ez gitxiago ondorenean  
jazar aundiak.

Zatitzen ditu aizeak gogor  
mendi-buruak;  
urratzen bean uiolak alor  
oparotsuak;  
jasa bizia dakar berela  
ekaitz-oiuak,  
misto suminkor latza bezela  
sube-txistuak.

Sututzen dira tximistaz jota  
zugatz igarrak,  
gorritzeraiño bere sugarraz  
odei nabarrak;  
itxas aldera gainka dijoaz  
ibai azkarrak,  
gero ta geigo purrukatuaz  
mendi-baztarrak.

(E. Arrese'k)

## Errekaiak



Janariak egosi ta erretako, sua egin bear da.

Sua egiteko, errekiñak, txirbil, ezpal eta egurak bear  
dira.

Su artu baizen laster, errekiñak garra ataraten dau.

Sua, egur-ikatzaz be egin daiteke. Ikatza ikazkiñak  
egiten dabe.

Txondorra deitzen yako ikatza egiteko egurpilloari.  
Egurpilloa, lurrez estali ta azpitik su emon-da pitinka-  
pitinka ikatz biurtzen da.

Sukaldean erreten dogunak egiten daben kea, kebi-  
detik gora joaten da.

Arrikatza, lurpetik ataraten da. Lenago, orain milla urte asko dala, baso aundiak ziran lur gaiñean.

Baso orreik gero, urpean eta lurpean geratuta, arri biurtu ziran.

Eta orain, ainbeste urte ondoren, arrikatz orixe da errekairik onenetaiko bat.

Arrikatzetik beste gai asko be ataraten dira.

## Burdiñea

Burdiñea be lurpean izaten da, baiña lurpean danean ez da oraindik burdin, burdinkia baiño.

Meatzetatik ataraten dan burdinkia labetan urtu bear da burdiña egiteko.

Burdiñea sutan landuta, galtzairu egiten da. Galtzairua, burdiñea baiño gogorragoa da.

Burdiñea, gauza askotarako erabilten dogu. Ezin egin-go litzakez millaka gauza burdiñarik bage.

Eta, alan be, gizona urte askotan bizi izan zan burdiñarik ba-zanik be jakin bage.

Orduan tresnak zurezkoak eta arrizkoak izaten ziran.

## Aizkora eta kirtena

Egurgille bat  
sort-egitera  
joan zan basoan zear,  
eta bidean  
galdu ei yakon  
aizkoratikan kirtena.

Sort-egiteko  
beste barri bat  
egin nairik aizkorari,  
gaia eskatzen  
asi ei yakon  
an zan zugatz bakoitzari.

Iñok ez eutson  
gairik emon nai,  
eta arteak bakarrik  
adar metxo bat  
eskiñi eutson  
gaixo artaz kupiturik.

Kirten barria  
egin ondoren  
sartzen dautso aizkorari,

eta jo-ta-jo  
or asten yako  
arte arixe berari.

Au ikusita  
or asten dira  
zumarrak eta leizarrak,  
arte onari  
gogor egiten  
oiu eta deadarrak:  
—Asto aundia,  
(esaten dabe)  
ez al ekian oraindik  
egurgilleak  
bizi dirala  
guk galtzen dogun bizitik?

Orra zer esker  
emoten dauan:  
orain asi dok igandik;  
laster ez gaozak  
bat bakarrikan  
basoan itxiko zutik.

Ir! bakarrik  
egin ba'evan,  
kaikutzar ori, kaltea,  
ezer ez zoan;

baiña guretzat  
ez dok izango ohea.

Bere etsaiari  
emon ba'dautso  
noizbait norbaitek eskua,  
len edo gero  
ikusiko dau  
galdurik bere burua.

(Iturriaga'k)

## Garia


Garia ereiteko, lenengo lurra landu bear da.  
Lurra goldeaz iraultzen da.  
Lurra iraulita gero, mokil-jotzaillez sokillak jo bear  
dira.

Ondoren gari-aleak erein.

Andik illabete batzuetara, antxe erneko da garia.  
Galburuak egin ta eldu diranean, barriz, garia ebagi  
ta batu egiten da.

Batu nai ba'da, erein egin bear da.

## Aizea



Aizez inguratuta bizi gara, alde guztietatik.

Aizerik bage ezin bizi geintekenez.


Arnas artzean, aizea sartzen yaku barruan, eta berruko odola garbitu egiten dasku aizeak birikietan.

Baiña orretarako aize garbia bear da.

Mendi gaiñetako aizea, geienetan, bekoa baiño garbiagoa izaten da.

Origaitik ona da, al dan guztian, leioak zabalik lo egitea, aizea barritzeko aiña beñipein.

## Edurra




Neguko eguraldi txarretan, goietan otz dagoanean, euriaren ordeaz edurra egiten dau.

Umetan nor ez da pozik egon, mara-mara edurra diarduala ikusten?

Edurra ez da otzak gogortutako euri-bisutsa baiño. Bisuts-tanta txiki orreik alkarganatuta edurmatataza egiten dabe.

Edurra polita da, egun batzuetan ikusteko. Baiña azkenerako aspertu egiten dau. Zuritasun arek, ixiltasun arek, eriotza gogoratzen dasku.

## Izotza



Otz aundia egiten dauanean, ura oso gogortu egiten da. Otzak gogortutako urari, izotza esaten dautsogu.

Izotz zati bat sutondoan ipinten ba'dogu, ur biurtzen da, eta orduan izotza urtu egiten dala esaten dogu.

Izotzaren antzera berotan urtzen dira burdiñea, beruna, zidarra, urrea ta beste menasta guztiak be.

Errialde batzuetan, oso otz aundia egiten daualako, ibaiak eta baita itxasoa be izozten dira, eta gizonak eta burdiak be gaiñean ibilli daitezke.

## Itxasoa

Itxasoan batzen dira ibaietako urak, baita ibai orreik ekarten dabezan ondar, arri ta beste gai guztiak be.

Bein be ikusi al dozue itxasoa? Azkenik ez dauan zelai aundi bat dirudi. Itxasoak Jainkoaren aunditasuna agertzen dausku.

Bere gaiña, geienetan, olatuz edo uñez zimurtua ikusten dogu. Eta ekaitza danean, ikaragarriak dira olatuak.

Itxasoaren ondoa oso aundia da: emen ditugun mendi guztiak baiño aundiagoa.

Itxasoak egunero izaten ditu bere gora-berak. Goruntz doanean, izgora deitzen yako; eta bera doanean, izbera.

Legorra ta itxasoa ikutzen diran tokiari, izbazterra deitzen dautsogu.

Eta itxasoan sartzen dan legor-zatiari, lurmuturra.

## Arrokeriaren ondorena

Ikusirikan igel zar batek  
oxin-ondoan idia,  
burutaratu ez yakon bada  
axe aiñako izatia.  
Orretarako galdetu eban:  
—«Esan, umeak, egia:  
ea nazan ni aurrean dagon  
idia baizen aundia».

—«Ainbestekoa etzara, ama»,  
erantzun eutsoenean,  
igelak bere narru zimela  
puzturik ler-bearrean:  
—«Eta orain zer?» —galdetutzean,  
igeltxoak bat-batean:  
—«Oraindik, ama, txikia zara  
iditzar orren parean».

Asarraturik igel arruak,  
idia aiñako izan naiez,  
puztutzearren egin ebazan  
egiñalen egiñalez,  
an erori zan zart-ler eginda  
bere semetxoen aurrez,

idia nasai zegon lekutik  
ekiotsala irri-barrez.

Aundinaikeri ta arrokeriak  
orra zelako azkena!  
Nok bereakin naiko dauala,  
ori litzake onena.

(Sarriegi'k)

## Txitxarra eta txiñurria

Iduriten yakon bai  
errukigarria  
txitxarrari, auzoan  
eban txiñurria,  
ikusten ebalako  
lertuten lanean  
eguna pizkatxo bat  
onduten zanean.

Askotan esan eutson,  
ez irriz, benetan:  
—Ez yoat lanik egin  
neure egunetan;  
eta uste yoat nik,

nire mutikoa,  
lan egiten dabena  
dala txit astoa.  
Zer ibilli bear dok  
beti arrastaka,  
ezin gari ale bat  
karraiaturika?  
Etorri eta joan,  
beti jira-bira,  
eroateagaitik  
ale bat abira?  
Bizi-modu txar ori  
itxik, txiñurria;  
egin eik nik egiten  
dodantxo guztia.—

Txiñurriak jakiñaz  
gurasoetatik  
ezin biziko zala  
egin gabe lanik,  
txitxarraren esanik  
ez eban aditu,  
eta bere lanari  
oi eutson jarraitu.

Bitartean txitxarrak  
eban igaroten  
uda guzti-guztia  
sasian kantatzen;  
baiña gaizki jo eutson  
soiñua kukuak;  
uda joan ta eban  
atzemon neguak,

eta bai-dabelako  
kopet itsusia  
joan ziran txitxar kanta  
eta erausia,  
eta buruturikan  
udako ase  
otzak ekarri eban  
berekin gosea.

Txitxarra gelditu zan  
argala, ixilla,  
este tximurtuakaz  
eta erdi illa.

Oroitzen da auzoan  
ba-dala zer jana;  
ba-doa arrastaka  
txiñurriagana.  
Eta esaten dautso  
doi-doia argalez:  
—Adizkidea, dautzut  
eskatzen, eskarrez,  
zure gordaidutikan  
pizkatxo bat zer jan  
zelanbait egun baltz au  
igaro dagidan.

Ikusi ebanean  
ain argal txitxarra,  
txiñurriak, egiñaz  
gogotikan parra,  
—Ara! —esaten dautso  
zu onuntz, txitxarra?

Kantari ona zara,  
 beargille txarra.  
 Uda igaro dozu  
 erausian, kantan,  
 ni nenbillen artean  
 lertzen lan eta lan.  
 Eta orain nai dozu  
 txiñurri-nekeak  
 bete dagizan txitxar  
 alperren esteak?  
 Ez, ez orrelakorik;  
 ona da ikustea  
 mundu onetan zer dan  
 alper izatea.  
 Ni len nekatu eta  
 ba-noa jatera;  
 zu geldi egon zara...  
 zoaz kantatzera.

Lagundu bear yako  
 beargilleari;  
 ez, ostera, bein bere,  
 alperra danari.

(Iturriaga'k)

## Ondartzan



Xabiartxo ta Iziartxo oso onak dira, ta aitak eta amak  
 Getxo'ko ondartzara eroan dabez.

Umien poza, ain toki ederrean aurkitu diranean!

Bereala asi dira ondarreran zuloak, tontorrak eta zu-  
 biak egiten.


Naiko jolastu ondoren, Xabiartxo'k itandu dau:

—Aita, zer da mendi tontor a?

—A? Ugarte bat. Ur-artean dagoalako, urez ingura-  
 tuta dagoalako esaten yako Ugartea.

—Eta or aurrean doan gauza luze ori?





—Ori? Arraun-ontzi bat. Or yozak arrantzale batzuk euren arraunaz ontzitxo arin ori aurrera daroela.

—Eta beste gauza aundi a?

—A? Aize-ontzi bat. Zapi aundi areik zabaldua, aizearen indarrak daroalako esaten yakok aizeontzia. Beste areik lurrun-ontziak dituk, eta lurrunaren indarrak ibiltzen yozak.

Naiko jolastu ta asko ikusita gero, etxera joan ziran guztiak.

Umeak, onak diranean, euren gurasoak pozik eroaten dabez onelako gauza ederrak ikustera.

## Astuntasuna

Arri bat lurretik jaso nai dogunean, ikusiko dogu betik zerbaitek eusten ba'leutso lez gaitz egiten yakula jasotea.

Arri ori, beste gauza guztiak lez, astuna da. Arriaren astuntasunak egiten dau, jasotekoan, guk zailtasun ori aurkitzea.

Gauza guztien astuntasuna ez da bardiña: burdiña, lastoa baiño astunagoa da.

Astuntasuna neurtzeko, Azta-neurkia erabilten dogu.

## Belea eta sugea

Bela batek, sugea lo egoala ikusirik, joan eta mokoaz (pikuaz) arrapatu eban. Baiña sugea itxartuta, beleari lepoan bildu ta ito egin eban.

Gauzak egin baiño len, ondo ikusi bear dira; bestela, gauza ona aurkitzea uste dogunean, askotan txarra urte-ten yaku.

## Izkuntzak

Jainkoak gizonari emondako gauzarik ederrenetaiko bat izkuntza da.

Izkuntzaren bidez adierazten ditu gizonak bere go-  
goak, bere atsegiñak, bere atsekabeak.

Era askotako izuntzak dira; abenda geienak badabe eurena.

Izkuntza orreik be ez dira alde guztietan bardin izaten. Izkuntza bateko bardiñak ez diran itz egiteko erai, izkelgiak deitzen yake.

Ludian zabalduenak diran izkuntzak, ingelera, pan-  
tzera, doitxera eta españera dira.

Gure izkuntza, euskera da. Ludian dan izkuntz zarrenetaiko bat; eta ikasi daben jakintsu guztiak, bere edertasunez arrituak geratu dira.

## Euskalerria

Ara zein alai dagon  
gure sorterrria,  
aritz, pago ta lizar  
bikaiñez jantzia!

Alde bateko mugan  
itxas ugarria,  
arkaitza jo ta astintzen  
bere apar zuria;  
saroi aparotsuak,  
kerizpe geldia,  
baserritxoak nunai  
ta nunai bakia;  
mendi-gain bakoitzean  
txabola txikia,  
artalde bat ondoren,  
gero... gurutzia!

(E. Arrese'k)

## **Euskalerraren edertasuna**

Ez guk onela diñogulako, arrotzak be diñoelako baiño,  
Euskalerrria, ludiko tokirik ederrenetaiko bat da.

Zelai ikusgarriak agiri ditu nunai.

An eta emen zugatzez ondo ornidutako mendiak: Ori,  
Aizkorri, Aralar, Anboto, Gorbea ta Ernio dira goituene-  
taikoak.

Ibai oparoak ongarritzen dabez zelai ta ibarrak eta  
erabilten ainbeste ola ta lantegi, bazter guztietan: Ibaiza-  
bal, Mundaka, Deba, Oria, Urumea, Bidasoa, Errobi edo  
Nibe, Ebro ta Arga dira gure ibai aundienetaikoak.

Bere erri ezagutuenak Bilbao, Gernika, Tolosa, Azpeiti,  
Donostia, Gazteiz, Donibane, Atarratze, Maule, Iruña ta  
Izarra dira.

Nok ez dau entzun Donostia'ren edertasuna? Izan dai-  
teken erririk eder eta politena dala diñoe ao batez guz-  
tiak.

Poztu gaitazan, bada, Euskalerrria'n jaioak gareanok.


## **Euskal-eresia**

Tontor gaillenez inguratua  
zauden lur maitagarria  
mendi bakoitza ba'litz bezela  
beronen gordelaria;  
gizon ernai ta zintzo askoen  
sorterri kutsu-gabia...  
lurrin beroaz orniturikan  
euskaldun izan zaitia.

Euskalerrria goitu dezagun  
euskera maite degunak,  
aitortu lengo zorion eder  
berak eman dizkigunak;  
nunai arduraz banaturik itz  
amari jaio t'entzunak,  
alkartasunez bizi gaitean  
beti-beti euskaldunak.

(E. Arrese'k)

## Alkartasuna indarra da



Nekazari batek seme-alaba asko ebazan. Baiña, geienetan, euren artean asarre izaten ziran.

Bein ta barriz, onela bizitzea eurentzat kaltegarri zala esan arren, egunero iskanbillen bat izaten eben.

Batean aitak, guztiak baturik, abar sorta bat eskuetan artu ta onela esan eutsen:

—Ikusten dozuez abar oneik? Bat-banaka austen oso errezak dira. Ikusi egizue zeuek be. Baiña guztiak alkartuta sorta bat egiten ba'dogu, nok ausi? Zuek be guztiok alkartzen ba'zarie, alkarri lagunduaz, sendo izango zarie; baiña banatu ezkeru, laster galduko zarie. Alkartasuna indarra da: izan au beti gogoan.

## Lantegi eta olak



Ola deitzen eutsien len burdiña urtu ta lantzeko egiten ziran etxe aundiai. Oindiño be nun edo an ikusten dira ola zarrak.

Baiña gaurko egunean era askotako olak ditugu: ingi-ola edo paper-olak, untze-olak, txapel-olak eta beste asko.

Ola aundi orreitan langille askok lan egiten dabe, ta makiña edo tramankuluena bidez egunetik egunera gauzak errezago egiten dira.

Arrigarriak dira ola orreitan diran aurrerapenak. Lenago langille batek amar gauza, egun guztian gelditu barik lan egiñaz, egiten ba'ebazan, orain, ia neke barik, eun edo berreun egin legikez.

Gizonak sortutako aurrerapenak, arrigarriak dira.

## Sumendiak

Mendi batzuk, euren muturretik, autsa, kea ta sua botaten dabe. Eta sumendiak deitzen yake.

Askotan ke utsa dariocela egoten dira luzaroan; baiña, noizean bein, su ta gar asten diranean, gizon biozdunenai be bildurra sartzen dautsie.


Ango lurrikarak, ango turmoi ta tximistak, ango autsjasteak egiten daben illunpeak, edozein ikaratzen dabe.

Sumenditik urtua urteten dan laba goriak erri asko ta asko kiskali ta galdu izan ditu.

Itali'ko Napoli'n dagon Besubio-sumendia, oso ezaguna da.

Orain bi milla urte berak auspean estalduta itxi eban Pompei erri ederra, urte asko ez dala, autsa kenduaz, antxe agertu dabe lurpetik italiarrak.

## Idazketa



Jainkoak egin ebanetik bertatik gizonak itz egiten bae-  
ekian; baiña alan be urte asko joan ziran beste gauza  
arrigarri au sortu eban arte: bere gogoak, bere itzak,  
arrian, olean, narruan, paperean, ikusten diran lerro edo  
ikurraz idatzi ta irau-eraztea askoz geroztik sortu eban  
gizonak; eta orixe da idaztea.

Iñok ez daki nor dan idaztea sortu ebana.

Idazkera asko dira. Batzuk ezkerretik eskumara idaz-  
ten dabe, guk lez; besteak, eskumatik ezkerrera; besteak,  
goitik bera, eta beste batzuk betik gora.

Idazkortzaz idazten dogu: axotean, tintan, muturra  
bustiaz.

Idazketari eskerrak, eldu yakuz gaurdaiño antxiñako  
jakitun askoren gogo ta asmo ederrak.

Itzak egan joaten dira, baiña idatziak irau- egiten  
dau.

## Idaztia



Orain eskuetan daukagun au idazti bat da, liburu bat.

Idazti onek orriak, eta orri bakoitzak orrialde bi ditu. Orriak, zuriak dira. Izkiak, baltzak.

Orriak, ingizkoak, paperezkoak dira.

Gaiñekoari azala edo idazti-azala deitzen yako.

Idaztiak, len, eskuz idatziak izaten ziran; baiña 1450'garren urtean Gutenberg doixtarrak irarkintza sortu eban ezkeru, irarkiñez irarriak egiten dira.

Iartzeko berunezko izkiak erabilten dira. Izkiak bear lez ipiñi ondoren, makiña batean jarri eta axotez beztu bear dira; eta gero arein gaiñean ingi edo papera zapalduaz, irarketa egiña gelditzen da.

Onela, eta baita beste era barriagoetara be, egiten

dira gaurko egunean ainbeste ta ainbeste idazti eta ainbeste izparringi.

Irakurtea, ogia baizen egunerokoa da gaur askorentzat.

## Ludiaren zatiak

Bost dira: Europa, Asia, Apirka, Amerika ta Ozeania.

Europa da txikiena, baiña baita aurreratuen be. Bertan bizi diran abenda geienak, zuriak dira.

Asia da zatirik aundiena. Ludiko mendirik goituen antxe dago. Zortzi milla neurkin edo metro baiño geiago ditu Imalaia'k. Asia'n bizi diran abenda asko, orietakoak dira.

Apirka da zatirik beroena, eta ango abenda geienak baltzak dira.

Amerika bi zatitan ebagia dago: goikoa eta bekoa. Be-koan dago ludiaren ibairik aundiena: Amazonas-ibaia.

Kolon itxasgizon bulartsuak aurkitu eban Amerika. Baiña, askok uste dabenez, a baiño lenago arrantzale euskaldunak bai ei ziran ara elduak.

Ozeani geiena ugarte txiki askotan sakabanatuta dago. Ugarte orreitan bat, oso aundia da: Australia.



## Elkano



Elkano euskalduna izan zan ludi guztia lenengoz inguratu ebana.

Biotz aundiko getariar au, San-lukar'tik beste askogaz bost ontzitan urten zan Be-ko Amerika'runtz. Andik India'rako bide barri bat aurki-

tzeko asmotan joiazen.

Magallanes eben buruzain.

Magallanes'ena deritxon Itxas-estua aurkitu ondoren, Pillipin-Ugarteetara eldu ziran.

Baiña an, Magallanes angotarrak il eta, bere lagunak Elkano jarri eben agintari; eta gose, neke ta naigabe artean ludi guztia inguratu ondoren, bidean iru urte igaro ta gero, an eldu ziran barriro be len urtendako tokira, 1522'ko Agorraren 6'an.

Izan daiguzan beti gogoan Elkano lako gizonak, euren antzera guk be, biotza sendotu dagibun.

## Guztiok lan egin bear dogu



Eguzkia agertu da. Errian eta mendian guztiak oetik jagi dira.

Amak bere umetxoak jantzi ta garbitu ditu. Aita bere lanetarako etxetik urten da.

Guztiak, bate-tik bestera, euren eginkizunetara doaz.

Lantegietan, oletan, saltokietan, langilleak batu dira euren lanari ekiteko.

Argiña, ormak egiten asi da; zurgiña, bere zura ta egurrak lantzen; burnigiña, galtzairu ta burdiñak erabiltzen; jostuna, soiñekoak ebagiten; oiñetakogillea, oiñetakoak egiten.

Osagillea be ba-doa bere gaxoak ikustera. Irakaslea, barriz, bere ikasleai irakastera.

Ene umetxoa: gizon guztiok lan egin bear dogu; batzuk batera eta besteak bestera, batzuk eskuz, besteak buruz.

Lan barik ez dago ez janaririk, ez jantzirik, ez bizitokirik, ez pozik, ez atsegiñik.



Guztiok lan egitea Jainkoaren gogoa da.



## Izadiaren iru zatiak

Izadi guztia, Jainkoak egiña da.

Arri bati begira egiozu: ez dau zentzunik eta bere tokitik ezin igitu daiteke. Bizirik ez dau. Onen antzeko gauza guztiai Meak deitzen dautsegu.


Begira egiezu orain bedarra, loreai, gariari eta sagar eta madariai. Areik be zentzunik ez dabe ta ezin ibilli daitekez; euren zanez lurrari lotuak dagoz. Baiña azten dira eta bizi dira. Orrei, landarak deitzen dautsegu.

Begira egiozu orain eguzkitan lore batetik bestera mar-go ederrez jantzita doan mitxirrika, edo adarrrik-adar arin ta alai dabillen txori abeslariari. Orreik beste zer bait dira: berez nai daben tokira ibilli daitekez, ba-dakie zer dan atsegiña ta atsekabea. Abereak deritxoe.

Mea guztiai batean, Meadia deritxoe; landara guztiai, Landaredia; eta abereai, Abeldia.

Orreik dira Izadiaren iru zati nagusiak.

## Abeldia



Abelztian ikasten dira abereai dagokiezan gai guztiak.

Abereak era bitakoak dira:

Azurdunak eta azurgabeak.

Azurdunak bost eratakoak dira:

1—Bulardunak.

2—Egaztiak.

3—Narrastariak.

4—Ur-lurtarrak.

5—Arraiñak.

Azurgabeetan dagoz:

1—Armiarmak.

2—Zomorroak.

3—Arrak.

4—Eun-oindunak.

5—Otarraiñak.

Gaiñera ba-dira Azurgabeetan Abel-landarak (Zoofi-  
toak), Soin-berak (Moluskoak) eta Zomortxoak (Mikro-  
bioak) be.

## Abeldia: Bulardunak

Bulardunak aoan ortz-agiñak eta narruan ulea daukie,  
ta euren umeak esnez azten dabez.

Geienak lau-oindunak dira, ta birikien bidez artzen  
dabe arnasa. Odol beroa dabe, eta geienak lurgaiñean  
jaio, azi, bizi ta ibilten dira.

Batzuk noiznai lurrean eta noiznai uretan bizi izaten  
dira, eta orrei ur-lurtarrak edo igerilariak deitzen yake.

Bulardunak era askotakoak dira. Ona emen ezagune-  
nak:

Tximiñuak dira azkarrenak, eta gizonaren antz geiena  
dabenak.

Aragizaleak, eta oneitan dagoz Katua, Legoia, Katamo-  
tza, Artza, Otsoa ta Txakurra.

Azal-lodidunak, izenak berak diñonez azala lodia da-  
benak dira. Oneitan dagoz Elepantea, Urzaldia, Txarria  
edo Urdea ta Basurdea.

Ausnarlariak, oneik lasterka jaten dabe, baiña gero  
urdalletik barrero aora jandakoa ekarri ta aoan ausnar-  
tzen dabe. Beia, Aaria, Oriña, Basauntza, Orkatza (Ga-  
muza), Konkorduna ta Bikonkorduna, ausnarlariak dira.

## Legoia zarrez ilten



Legoi guztiz aundi bat,  
ez-il bai-illean  
luze-luze etzunik  
egoan lurrean;  
urteen zamak eukan  
ezin igiturik,  
ez bai eban gaixoak  
zarra beste miñik.

Orruaz mendiz mendi  
zanean lenbizi,  
abereak ebiltzan  
agandik igesi;  
bat bakarrikan ez zan  
guztien artean  
itxarongo eutsonik  
iñolaz bidean.

Orain ikusirikan  
etzunik lurrean,  
esan dodan legetxe  
ez-il bai-illean,  
eta ito nai dabe  
gaxoa guztiak.

Zitalen kontua da  
gaxoa danari  
egin nai izatea  
barre eta irri.  
Gizon zintzoak ez dau  
onela pentsatzen;  
gaxoenari dautso  
geiena laguntzen.

(Iturriaga'k)

## Abeldia: Bulardunak

*Jarraipena*

Atzazkal batekoak. Oin bakoitzean atzazkal bat baka-  
rrik dabelako, deritxoe onela. Beiak-eta, bi bai dabez.

Zaldia da era ontaikoetan abererik ederrena. Buru lu-  
zea dau; belarriak, zuzen eta txikiak; begiratua, bizia;  
lepoa, luzea; eta ankak, medarrak. Ulea motza dau, baiña  
lepo gaiñean eta buztanean zurda luzeak be izaten ditu.

Astoa eta Mandoa ez dira zaldia baizen ederrak; bai-  
ña gizonari laguntza aundiak egiten dautsoez.

Izabereak edo itxasoko abereak uretan bizi izan arren,  
noizean bein ur gaiñera urten bear izaten dabe arnasa  
artzeko. Orreitan dagoz Balea eta Izurdea.

Balea da gaurko egunean dan abererik aundiena.

## Txoarrea eta erbia



Arrano batek eban  
erbi bat atzeman,  
eta an eukan itoten  
bi atzaparretan;  
txoarre batek ustez  
toki segurutik,  
oiu egiten dautso:  
—Ez dok esaten ik  
ez dala lur gaiñean  
aurkitzen mutillik  
lasterketan i beste  
joan daitekenik?  
Orain zetan ago or,  
erbitxoa, geldi,

orren mutil ariña  
azen ezkeroz i?—

Onela itz egiten  
dautson bitartean,  
gabirai bat gaiñera  
dator bat-batean;  
artzen dau txoarrea  
aren atzaparrak  
eta kenduten dautsoz  
irri eta parrak.

Iñok mundu onetan  
ez dagike esan  
ur onetatikan nik  
ez dot bear edan.  
Usterik gitxiena  
guk dogun orduan  
aurkitu oi gerade  
besteen lekuan.  
Agaitikan bein bere  
zorigaiztokoaz  
ez dogu egon bear  
irriz eta parraz.

(Iturriaga'k)

## Abeldia: Bulardunak

*Jarraipena*

Sabel-sakeldunak deritxoe sabel-aurrean sakel bat dabena. Sakel ortan eroaten ditu amak bere umeak, txikiak diranean. Kanguroa da abere orreitan ezagunena.

Zomorro-jaleak deritxoe, zomorro-janaz batez be, bizi diranai. Eta orreitan dagoz Satorra, Kirikiñoa eta Lursagua.

Satorra, lurpean egindako bidetatik, zomorro-billa ibiltzen da. Bere begiak oso txikiak dira, eta bere ulea oso leguna. Kirikiñoa, iñok ikutzen dauanean, bere zurdille gogor zorrotzetan biltzen da.

Karraskariak. Onela deritxoe, matraillazur bakoitzean daukiezan agin luze biren bitartez janaria karraskatzen dabena. Oneitan ezagunenak, Sagua, Erbia, Muxarra eta adarretik adar bizkor ibiltzen dan Katagorria dira.

Saguxarra. Askok uste dabe egan ibiltzen dalako Saguxarra egaztia dala. Baiña ez da egaztia; ez bait-dau, ez mokorik, ez lumarik. Saguxarra be bularduna da.

Bere beatz luze artean daukan mintzari eskerrak, egiten dau egan.

Gautarra da, eta zomorro kaltegarri asko jaten ditu.

## Egaztiak

Oneik be azurdunak dira, baiña beste azurdunak ez lez oneik mokoa, lumak, egak eta anka bi dabez.

Abian arrautza egin eta arrautzetatik ateraten ditue umetxoak.

Arrautzeak iru gai ditu: azala, zuringoa eta gorringoa. Gorringoak tanto zuri bat izaten dau, ta axe da umearen azia.

Egaztiak era askotakoak dira. Ona emen ezagunenak:

- 1) Arrapalariak: Oneitan dagoz Arranoa ta Saia. Aragia jaten dabe.
- 2) Txoriak: Enarak, Kirikillak, Eskillasoak, Txan-xangorriak, Txepetxak eta beste askok, zomorroak jaten dabez.
- 3) Oilloantzekoak: Aleak irusten ditue. Oillo. Eper, Galeper eta onelakoak dira.
- 4) Ankaluzeak: Oillagorrek, Egaberak, eta abar.
- 5) Igerilariak: Ateak.

## **Txantxangorria**

Udara joan ta egun illunak  
ondoren datozenian,  
eguzkia ta gure poz danak  
ezkututzen diranian...  
zer ari zara orla kantari  
ordurik ixillenan,  
zer ari zara, Txantxangorria,  
ain era kupigarrian?

A, zenbat aldiz ala  
jardun txit maitian  
zotz baten puntan edo  
arantza-tartian  
zaudela egon ete naz  
an... aldamenian,  
neure miñak oroitzen  
zure jardunian!

Zure kolore ber-bera daben  
osto bakanak lurrian  
arboletatik erori eta  
soil dauden garai berian,  
begiak zabal-zabal jarririk  
antxe bide bazterrian  
egoten zara, txori gaixoa,  
negarrez udazkenian.

Papar gorri txikia  
lertzeko zorian  
lumetan bil-bil arro  
dadukazunian...  
ez dakit nola negar  
guztiak batian  
kabitzen diran zure  
kolko politian!

(E. Arrese'k)

## **Narrastariak**

Orreik be era askotakoak dira. Ezagunenak, Musker-  
rrak, Sugelindarak, Txaberamak eta Sugeak.

Sugetan asko oso gaiztoak dira. Olakoen ozkak edo  
usikadak gizon ta abereak bereala ilten ditu.

## **Ur-lurtarrak**

Txantxikuak, Igelak, Arrobioak dagoz orreitan.

## Arraiñak

Arrain guztiak uretan bizi izaten dira.

Ezagunenak Amorraña, Lebatza, Izokia, Aingira, Txardiña, Txitxardiñak, Makalloa eta beste asko dira.

Euren azur medar ta luzeai arantzak deitzen dautsegu.

## Arranoa eta azeria



Arranoak bere umetxoai jaten emoteko, azeri bati ostu eutsozan bereak.

Joan yakon azeria bereala umeen eske, baiña arranoak, bere burua indartsuago uste izan nunbait, eta azeriaren eskabideai barre egin eutsen.

Azeriak orduan, asarraturik, arranoa egoan zugatz edo arbolaren azpian su aundi bat biztu eban. Bereala garrak eta kea arrano aren abiraiño eldu ziran. Eta onek

bere umetxoak ito egingo zirala ikusi ebanean, azeriari bereak biurtu eutsozan sua itzali egian.

Ez yake bada gu baiño txikiagoai kalterik egin bear, eurak be guri kalte egiteko bidea artu legikie-ta.

## Abere azurbakoak

Bere izenak diñon lez, abere orreik ez dabe ez azurrik ta ezta odol gorririk be. Abere orreik guztiak, anak dabez oso ugari, batzuk geiago eta besteak gitxiago.

Bost eratakoak dira:

1.—Armiarmak. Oneik egorik ez dabe eta zortzi anken gaiñean ibiltzen dira.

2.—Zomorroak. Oneik era askotakoak dira, baiña guztiak sei anka dabez. Oneitan ezagunenetaikoak Eulia, Erlea, Amonamantalgorria, Kilkerra, Eltxoa, Akaña eta Listorra dira.

3.—Arrak. Onein soiña biguna da, oiñik ez dabe. Ezagunenak Lur-arra ta Izaia dira.

4.—Eun-oinzunak. Izen ori ez dabe eun oin dituelako, asko dituelako baiño, eunera eldu barik. Geienetan berrogei dituez.

5.—Otarraiñak. Azurbako abere oneik ur azpian arnas artu dagikee. Oneitan ezagunenak Otarraña, Misera ta Zangurrua dira.

## Abel-landarak

Abere oneik landara batzuen antza dabe euren adarretan, eta abel-landarak deitzen yake.

Ezagunenak Korala, Belakia (Esponja) eta Itxasoko Izarra dira.

Guztiak itxasoko uretan bizi izaten dira.

## Soin-berak

Onein soina edo gorputza oso biguna izaten da, ta geienak azal gogor batean bilduak bizi dira.

Ispel edo Ostrak, Barekurkuilluak (karakolak), Ba-reak eta Olagarro edo Amarratzak soin-berak dira.

## Zomortxoak (microbioak)

Zomorro txiki batzuk dira oneik. Txikikuskiñaz (Mikroskopioaz) ez ba'da, ez dira ikusten.

Gaitz ikaragarri asko zomortxo oneik sortuak dira.

## Landaredia



Landarak bizi, azi ta ilten dira, baiña ezin euren tokitik igitu edo mobidu daitezke. Zentzunik be ez dabe.

Iru eratakoak dira: Zugatzak, zugazñoak eta bedarrak.

Landara baten zatiak oneik dira: zanak, enborra, ostoak, lorak eta igaliak (frutuak).

Zanak batzen dabe lurpean landarearentzako janaria. Janari oni izerdia deritxo, eta mamin ta azalartean gora adarretaraiño igoten da.

Enborraren zatiak biotza, mamiña ta azala dira.

Ostoen bidez landareak, aizean dagozan gai batzuk be batzen ditu. Ta orixe da landarearentzat arnasa artzea.

Lora baten zatiak, batez be, ontzia, orritxoak, ariak eta autsa dira.

Igaliak barrenean aziak ditu.

Landara batzuk loragabeak izaten dira, eta oneitan dagoz zizak eta oroldia.



## Azeria eta matsak

Zintzilika daudela  
ditu azeriak  
ikusten mats-mordoak  
eldu ori-oriak;  
jarten da begiraka  
gaixoa goseak;  
barrena ibiltzen yako  
jateko zaleak.  
Saltoka asiten da  
alegin guztian;  
ordu bian ba-dabil  
ezin iritxian.

Ikusi dabenean  
ez dauala artzerik,  
matsai esaten dautse  
begiak jasorik:

—Zaute, zaute mordoak,  
zaute ostoetan;  
ez zarie oraindik  
jarri sasoiean.

Zerbait nai eta ezin  
ba'dogu iritxi,

azeriak bezela  
bear dogu itxi  
—Zaude, zaude, esanaz,  
zaude or berean;  
oraindik ez zara  
jarri sasoiean.

(Iturriaga'k)

## Meadia



Meak (Mineralak) bizirik ez dabe, ez dira azten, eta berez beti toki batean egoten dira.

Gaurko egunean ezagutzen diran meak bosteunen bat dira.

Ezagunenak lau zatitan batu daitezke:

- 1—Arriak
- 2—Menastak (Metalak)

3—Gatzak

4—Errekaiak

Arrietan daukaguz Karearria, Igeltsoarria, Auntzarria, Arbela, Suarria eta beste asko.

Menastetan daukaguz Burdiña, Beruna, Urrea, Zidarra, Zidarbizia, Burdingorria...

Gatzak era bitakoak dira: Gatzarria eta Itxasgatza.

Errekaietan dagoz Arrikatza, Arriorioa, Ikatz-lugarra (Antrazita)...

## Nekazaritza

Nekazaritzaren bidez lurak landu eta uzta eder eta ugariak batzen dira.

Azi txiki batek ale asko emoten ditu, lurak bear lez ongarritu ta lantzen ba'dira.

Golde, atxur, bostortz eta gaiñerakoaz iraultzen dira lurak lenengo, eta gero azia erein.

Sega ta itaiaz egiten da moztuketa.

Gari, olo, arto, artatxiki eta garagarrak; indaba, aza, arbi, baratzuri, mats, idar ta gaiñerakoak aberastasun handiak ekarri dagikeez lurra ondo lantzen dabena.

## Ekintza

Ekintza-itzak ola eta lantegietan gizonak egindako lanak adierazten dauskuz.

Era askotakoak dira lan oneik. Millaka gauza egin ta sortu ditu gizonaren buru argiak.

Ekintzaren biotza indarra da. Indarra bear da ainbeste ta ainbeste tramankulu edo makiña igitzeko.

Arrikatza erreaz ur-lurrunak emoten dauskun indarra asko erabilten ba'da be, gaurko egunean geiena zabaltzen asi dana tximist-indarra da.

Tximistindar-oletatik urruneko lantegi guztietara, ari batzuen bidez, zabaltzen da indarra.

Or nunai mendi guztietan ikusiko dituzue ari orreik. Baiña ez ikutu. Ikutu ezkerro ilgo zarie-ta.

Arrigarria da gizonak, nai lez, orrelako indar handiak noranai eroatea!

## Salerosketa

Ez da naikoa gauzak eta gaiak egitea. Egiten dituenak besteri saldu egin bear; eta bear dituanak erosi.

Ortik etorri da salerosketa.

Len gauza batzuk beste gauzaz ordaintzen ziran.  
Baiña gero dirua sortu zan, eta orain diruz ordaintzen dira gauzak.

Gizonak sortu zituan neurriak be, saltzeko gauzetan okerririk izan ez edin.

Onela daukaguz luzerarako:

Neurkia, (metroa) eta bere aundiago ta txikiagoak.

Astuntasunerako:

Aztaki (kilo) eta bere aundiago ta txikiagoak.

## Zelan ibiltzen garean



Gizona, berez, oin bigaz ibiltzen da. Baiña lasterrago ibilli naiean, aspalditik ibilli izan da astoz eta zaldiz be.

Gurpilla ta burdia be aspaldi sortuak ditu.

Baiña gero ta lasterrago ibilli nairik azkenengo urteetan Bultzi edo Trena asmau dau. Bai aurrerapen aundiak ekarri dautsozala gizonari asmaketa eder orrek!

Gaurko egunetan oraindik aurrerago joanda, barriz, Gurtariña edo automobilla eta Egazkin edo Aeroplanoa asmau ditu.

Gurtariñak laguntza aundiak ekarri dauskuz; eta Egazkiñak, egan, txorien antzera ibilteko bidea emon dausku.

Itxasorako be gauza arrigarri bi sortu ditu: Urpejantzia eta Urpeontzia. Lenengoaren bidez gizon bat urpean ibilli daiteke, ta lanean jardun be bai, aldi luzean. Eta bigarrenaren bidez ontzi osoa ibilli daiteke, bere gizon ta guzti, ordu osoetan urpean.



Eta urgaiñean, lenengo ontzi txikietatik ia erria aiñako ontzizarretaraiño eldu da. Gaurko egunean Ameriketa'ra be oso egun gitxitan, aste bete baiño len, joan daiteke.

## Beste aurrerapenak

Egunetik egunera gizonak aurrerapen barriak asmetan diardu.

Txikikuskiñaren bidez, begi utsez ikusi ezin daitezkan xomorro txiki-txikiak, garbi-garbi agertzen yakuz.

Ainbeste zabaldu dan eta ainbeste erabilten dan Argazkintza edo Fotografia, dirudienez, euskaldun batek, Dagerre'k sortua da.

Urrutidazkiaren bidez guregandik oso urrun dagozan tokietara une berean idazkiak bialdu leitekez.

Urrutizkiña oraindik be arrigarriagoa da: gure itzotsa, ari batzuen bidez, oso urrunera eroaten dau.

Baiña gaurko eguneko aurrerapenik aundiena Aribako Urrutizkiña da. Onen bidez urrutiko errietatik itz egiten yakun guztia, naiz abesti, naiz itzaldi, naiz eresbatz, naiz beste edozein ots, etxetik bertatik entzun gengike, bien bitartean ari bat be ez izan arren. Gauza arrigarria!

Eta azken urteotako Urruti-ikuskiña? Onen bitartez, urruneko otsak ez entzun bakarrik, baita iduriak ikusi be egiten doguz.

## Kirolak



Euskaldun batentzat kirolik edo jolasik ederrena pelota-kirola da. Era askotara jokatu daiteke pelotan: eskuz, xarez, saskiz, palaz, luzeran, errebotean, irristadan (erremontean)...

Euskaldun guztiok jolas au, oso maite bear genduke: gure-gurea ta eder-ederra bait-da benetan.

Baiña beste kirol asko be ba-dira, eta ezagutuenetaiko bat ostiko-jolasa da. Amaika mutillek beste amaikaren aurka jokatzen dabe. Amaika oneititik bost dira aurrelariak, iru erdikoak, bi atzelariak eta bat atezaiña.

Beste jolas atsegingarri bat, mendi goituetara igotea da. Soiña asko sendotzen da ibilketa oneik egiñaz. Mendi-goizale izan zaitzeze, bada.

Beste kirol askoren artean lasterkariak, igerilariak eta abar be ba-dira.

## Edertiak

Gizona, berez, ederzale da. Jainkoak emona dau gogo ori.

Aspaldi-aspalditik orrelaxe agertu dau, eta Ejipto'n, Gerkerra'n eta Italia'n, batez be, antxiñako gauza eder arrigarri asko ikusi daitezke oraindik.

Margoertiak (Pinturak), Arriantzeriak (Eskulturak), Elertiak (Literaturak), Iratertiak (Arkitekturak) eta Eresertiak (Musikak), batez be, gizonaren biotzak Ontasuna, Egia eta Edertasuna beti maite izan dituela garbi agertzen dauskue.

## Eusko-eresiak

Ez da izango ludi guztian euskalduna baizen eres-zalirik.

Jaio baizen laster bere ama asiko yako abesti gozoen bat abesten:

Aurra egizu lotxo bat  
emongo dautzut gozo bat:  
aitak bat eta amak bi...  
zeruko Jaunak amabi.

Umea azi da (diño Donosti Aba ereslari euskaldun ospetsuak); zortzi urte ditu; bere kidekoakin inguruan eskuetatik batuta abesten dau:

Makilla or eldu da  
txakurra jotera:  
txakurrak otsoa,  
otsoak akerra,  
akerrak artoa,  
akerra ken!  
Gure artotik  
akerra ken,  
arren!

Edo bestela ustaian, eskuetatik elduta, nai neska nai mutillak, bizi-bizi, abestuko dabe:

## Euskalerra'ko mendiak

Batek: Ori-mendi  
tontorreko  
pagoaren  
puntan,  
Guztiok: puntaren puntan,

Batek: Ori'ko txoria kantari:

Biek: ...txiru-liru-li

txiru-liru-li...

Guztiok: Nok kantatuko ete dau  
soiñutxu ori?

## II

Batek: Aizkorri'ko

tontorreko

arantzaren puntan,

Guztiok: puntaren puntan,

Batek: erbi-iñudea dantzari:

Biek: ...triki-triki-ti

triki-triki-ti...

Guztiok: Nok dantzatuko ete dau  
dantza arin ori?

## III

Batek: Anboto'ko

tontorreko

arkaitzaren

puntan,

Guztiok: puntaren

puntan,

Batek: sorgiñak kontu-kontari:

Biek: ...uju-juju-ju

iji-iji-ji...

Guztiok: Nok ixillaziko ete dau  
algara ori?

## IV

Batek: Aralar'ko

tontorreko

Larrunarri-

puntan,

Guztiok: puntaren

puntan,

Batek: Fernando ta bertsolari:

Biek: ...zuk niri ziri

nik zuri ziri...

Guztiok: Iñok onduko ete dau  
ziriket'ori?

Nok ipiñi dagikez emen gure abestien edertasun guztiak? Ezin.

Ene ume maiteak: ikasi egizuez euskel abestiak. Areik dira zuen biotzaren samintasunak, zuen pozak, zuen atsegiñak ondoen azaltzen dabezanak.

\* \* \*

Ene umetxoak! Idaztitxo ontan ikasi dituzuen gauza onak gogoan artu egizuez, eta ez dagizuezala bein be aztu jakintzak eta Zintzotasunak batez be, emoten dautsoela gizonari izenik onena.

**A Z K E N A**

## NUN ZER

Jaungoikoa ... ..	3	Beste langintzak ... ..	30
Xabiartxo ... ..	4	Menastak ... ..	31
Iziartxo ... ..	5	Mendiak ... ..	31
Garbitasuna ... ..	6	Abendak ... ..	33
Ikastolara ... ..	6	Azia ... ..	33
Ikastolako atean ... ..	7	Zugatza ... ..	34
Irakurtea bearra da ... ..	7	Abiak ... ..	35
Gizabidea ... ..	8	Elaiia ... ..	36
Gizona ... ..	9	Ume errukitsua ... ..	36
Giza-soña ... ..	9	Artzaina eta ardiak ... ..	37
Soin-enborra ... ..	10	Ura ... ..	39
Soin-adarrak ... ..	11	Uraren bearra ... ..	39
Ikusmena ... ..	11	Txakurra eta aragi-puska ... ..	40
Entzumena ... ..	12	Ura zelako eratan agertzen ya-	
Usainmena ... ..	13	kun ... ..	41
Gozamena ... ..	14	Egaztiak ... ..	42
Ikumena ... ..	15	Esaera zarrak ... ..	43
Gogoa ... ..	16	Urrezko arrautzak egiten zi-	
Jantzia ... ..	17	tuan oilloa ... ..	43
Janariak ... ..	18	Arraiñak ... ..	44
Ogia ... ..	19	Etxeko abere ta piztiak ... ..	45
Ogirik ez da bein be bota bear.	19	Lagunak ... ..	46
Edariak ... ..	20	Aita nolako, seme alako ... ..	47
Iziartxo'k biotz ona dau ... ..	20	Zelako aldeia ... ..	48
Esaera zarrak ... ..	21	Erleak ... ..	49
Erregea ta tximiñoak ... ..	22	Golde biak ... ..	49
Etxea ... ..	23	Mutil zintzoa ... ..	50
Kun-Kun ... ..	24	Ez da asarratu bear ... ..	51
Erria ... ..	25	Abereen garrasi ta otsak ... ..	51
Baserría ... ..	26	Adizkide bi eta artza ... ..	52
Nere etxea ... ..	26	Lorea ... ..	54
Argia ... ..	27	Txori gaixoa ... ..	55
Argiña ta zurgiña ... ..	28	Mutil ona eta mutil gaiztoa.	55
Alaitasuna ... ..	29	Sugea eta nekazaria ... ..	56
Langintzak ... ..	29	Batuketa ... ..	58

Kenduketa ... ..	59	Alkartasuna indarra da ... ..	102
Ludia ... ..	59	Lantegi eta olak ... ..	103
Udabarría ... ..	60	Sumendiak ... ..	104
Basoa ... ..	62	Idazketa ... ..	105
Uda ... ..	62	Idaztia ... ..	106
Egun-sentiko pozak ... ..	64	Ludiaren zatiak ... ..	107
Igeri egite ... ..	65	Elkano ... ..	109
Udazkena ... ..	65	Guztiok lan egin bear dogu ...	110
Labore-batzea ... ..	67	Izadiaren iru zatiak ... ..	112
Negua ... ..	68	Abeldia ... ..	113
Eguzkia ... ..	70	Abeldia: Bulardunak ... ..	114
Egunsentia ... ..	71	Legoia zarrez ilten ... ..	115
Gizonaren bizia ... ..	72	Abeldia: Bulardunak ... ..	117
Ilunabarra ... ..	73	Txoarrea eta erbia ... ..	118
Ortzea edo zerua ... ..	74	Abeldia: Bulardunak ... ..	120
Illargia ... ..	76	Egaztiak ... ..	121
Zugatzai ez kalterik egin ... ..	77	Txantxangorria ... ..	122
Eguraldi ona ... ..	78	Narrastariak ... ..	123
Eguraldi txarra ... ..	79	Ur-lurtarrak ... ..	123
Ekaitza ... ..	80	Arraiñak ... ..	124
Errekaiak ... ..	81	Arranoa eta azeria ... ..	124
Burdiñea ... ..	82	Abere azurbakoak ... ..	125
Aizkora eta kirtena ... ..	83	Abel-landarak ... ..	126
Garia ... ..	85	Soin-berak ... ..	126
Aizea ... ..	86	Zomortxoak (microbioak) ... ..	126
Edurra ... ..	87	Landaredia ... ..	127
Izotza ... ..	88	Azeria eta matsak ... ..	128
Itxasoá ... ..	89	Meadia ... ..	129
Arrokeriaren ondorena ... ..	90	Nekazaritza ... ..	130
Txitxarra eta txiñurria ... ..	91	Ekintza ... ..	131
Ondartzan ... ..	95	Salerosketa ... ..	131
Astuntasuna ... ..	97	Zelan ibiltzen garean ... ..	132
Belea eta sugea ... ..	98	Beste aurrerapenak ... ..	134
Izkuntzak ... ..	98	Kirolak ... ..	135
Euskalerria ... ..	99	Edertiak ... ..	136
Euskalerríaren edertasuna ... ..	100	Eusko-eresiak ... ..	136
Euskal-eresia ... ..	101	Euskalerrí'ko mendiak ... ..	137